

欽定八旗通志卷二百三十六

人物志一百十六

循吏傳一

漢軍鑲黃旗

漢軍正黃旗

謹按循吏列傳始於史記然名臣如鄭之國僑摺挂危疆扶持孱主內修政事外禦強鄰僅以循吏目之無乃隘乎前後漢書所載州郡之長吏爲多斯名實相符矣惟是是非歷久而論定恩讐未盡好惡多私德政去思諸碑未足依據近

特旨仆毀仰見

大公至墓誌墓表神道碑蔡邕稱平生所作惟郭有道碑無愧色則其他有愧可知韓愈號剛正不阿劉父乃諷其諛墓得金則不如愈者槩可想見其詞亦難爲憑今於舊志所載仍列於傳其舊志所未

載者則惟以各省奏祀名宦者爲據猶之節婦烈女以會邀

旌表爲斷云爾雖記載寥寥似乎掛漏然於春秋謹嚴之旨亦庶幾乎不悖矣

漢軍鑲黃旗外任官

楊天祐

楊天祐漢軍鑲黃旗人順治三年任直隸大名府開州知州愛民重士政簡刑清時值山東大寇丁鳴吾率賊萬餘自朝城攻開州由北門越城入直至州署天祐率家人奮勇禦之殲鳴吾兄子復射

鳴吾中左脅賊潰鳴吾傷重道死大寇遂滅蘭州
咸獲生全州民感之崇祀名宦祠

董鳳舞

董鳳舞漢軍鑲黃旗人順治五年任上杭縣知縣
時地方初定人戶流移田多荒蕪鳳舞招徠墾闢
撫卹備至適援勦潮漳之兵道經上杭往來絡繹
供需百出鳳舞拮据措置不病民而供億無誤尋
以積勞卒於官人思其德祀本縣名宦祠

郎熙化

郎熙化漢軍鑲黃旗人順治十六年任高州府通判執法不撓凡地方賦役陋規悉申請革除其驕兵悍卒誣陷良民者即覈實按法民恃爲長城云

後崇祀高州府學名宦祠

謹案舊志載郎熙化同旗張可立先世居福建福清縣

國初始入旗籍順治十二年乙未科成進士十七年任四川劍州知州時土寇初平學校廢弛百姓流亡轉徙未盡復業可立蒞官一以重士安民爲務州人德之亦崇祀名宦今通志之例凡已入旗籍

之人所生子孫乃入志其初由漢人入旗者雖孔
有德洪承疇之功亦不載入是以刪去不列其名
謹附議
於此

金雲鳳

金雲鳳漢軍鑲黃旗人康熙二年由筆帖式任荊
州府通判值定西將軍圖海等征茅麓山流寇軍
需浩繁西山險道輓運維艱家派一夫轉運多道
斃者雲鳳設法轉輸詳請永免戶夫之派民甚賴
之在任察吏安民弭盜剔奸凡爲民害者密行諮

訪悉治以法加意學官分題校課多士咸振興焉
九年陞浙江嚴州府同知累陞至霸昌道三十六
年卒崇祀荊州名宦祠

于宗堯

于宗堯漢軍鑲黃旗人康熙七年由廕生任常熟
縣知縣時漕政積弊糧俱民運輒至破家宗堯創
議詳定官收官兌民困得甦至今永賴其利其餘
美政尙多備載邑乘以積勞成疾十一年四月卒

於官邑人思其德留葬於虞山之麓十八年崇祀
名宦祠

趙良璧

趙良璧漢軍鑲黃旗人康熙八年由廕生任山西
徐溝縣知縣勤課農事見勤於田事者一一獎賞
間有怠惰者微懲之在任六載荒蕪盡闢勸宣

聖諭每月朔望令鄉耆約長以次宣讀有未明晰者必親
爲詳解務使人人通曉催科有法民皆踴躍輸將

編審丁差加減必核實學宮傾圯捐資改建城樓
塌壞者重葺之挑濬城壕沿堤植柳千餘株城隍
廟火焚倡率士民重修徐溝久不發科彤家言宜
於城外異地築一支峯力未及舉於去任後寄銀
四百兩令建文昌高閣嗣是科甲有人士子尸祝
焉在任值天時亢旱聞太原縣晉祠鎮水母最靈
距徐溝四十餘里良璧露頂跣足徒步拜禱甘霖
立沛革除舖戶里民應承陋例詞訟不受錢不聽

請託察胥役尤嚴差票莫敢需索紳衿士庶賢者
獎之不肖者懲之先是徐溝黨棍竊盜日夜橫行
自良璧到任匪類潛踪募夫工食按季發給馬
草豆親自採買不私派里戶善政甚多累陞至浙
江布政使頗過於威稜然徐溝人德之崇祀名宦
祠

許宏勳

許宏勳漢軍鑲黃旗人康熙十三年任浙江紹興

府知府時逆藩耿精忠爲亂蹂躪浙東是年十二月宏勳同叅將滿進貴敗賊於嵎縣之長嶺桂門山嶺等處殺賊兵一千七百餘人生擒僞軍師邱爾章僞將軍馬玉等十四人賊兵三百六十六名招撫僞總兵馬瑞之等下部議敘累陞至雲南按察使二十七年楚省兵變震驚遠近滇南奸民造言煽惑七月二十日營卒張麻子要結黨羽將爲亂滇民貧而黠者多附之歃血誓盟期於是夜三

鼓舉兵劫掠適居民張喬得其謀赴署告急宏勳
立遣人密捕謀首飛揭上官委員坐譙樓令止擊
一二鼓時逆黨方聚衆飲酒聽鼓聲而發捕者猝至
首從皆就縛及旦究出渠魁立即正法脇從悉寬
宥不動聲色變弭禍息兵民安堵比卒人咸思之
公舉崇祀名宦祠同旗有盧燦者康熙十三年任
浙江龍游縣知縣亦以值耿逆反叛浙中賊盜竊
發燦勦撫兼施恩威并著邑內賴之二十五年卒

於官士民亦祀之名宦祠

王之佐

王之佐號變菴漢軍鑲黃旗人康熙十六年由監生任寧化縣知縣時耿逆初平海氛未靖徵求軍需日三四至之佐權宜變通得減其半二十年大勦海寇王師十萬駐漳州日餉千斛上游飛輓以次遞運寧化應派運夫五百名月一更代之佐念民疲役重力以免夫上請語特懇切督撫憐而許

之時有奉

欽差入閩閱查兵餉者頗作威福將入縣境之佐遠迎躬
爲導馬以縣署居之供具彌謹一宿卽護導出境
民間秋毫無擾會有黃機者乘甲寅三藩之變受
吳三桂僞劄脇其鄉黨從逆楊地一鄉不從遂圍
而屠之之佐請兵會剿時兵與海賊相持難以移
師之佐情詞懇切督撫許調二鎮兵會剿又值同
安告急檄調二鎮往援之佐力懇仍留三師言令

當以官爭去留不忍示弱以驕賊致民人糜爛聲
淚交迸督撫鑒其誠許之之佐遂部率鄉兵躬爲
嚮導蹙賊壘分攻之賊盡棄其衆越贛石入江西
投誠江西撫臣納之發符護賊還寧化使招集舊
部以成一旅之佐堅不奉檄昌言於大吏曰普天
王土非列國分疆之比閩賊卽江賊也若閩賊入
江卽當宥死江賊入浙又應偷生王法將誰加乎
如謂法外省過以招不庭則自江納之卽自江用

之今名寄江籍而身返閩巢閩之文武何顏臨之
乎大吏聽其言遂搗其巢穴設防兵洞口絕其歸
路數十年逋誅獷族皆鳥獸散之佐戮力行間每
領兵數千旦夕巡行營壘聯客師爲指臂市井
肅若無人後以勞得寒疾卒軍民震悼罷市巷哭
者三日思之不忘崇祀本縣名宦祠

張聲遠

張聲遠漢軍鑲黃旗人康熙二十年由監生任湖

廣臨武縣知縣在任作士愛民廢墜修舉縣學宮
燬於明季康熙初年始建規模未備聲遠加意振
興凡兩廡櫺星門及名宦鄉賢祠宇師儒齋舍次
第營構煥然維新均編徭役釐定里分丁糧均平
時大兵猶進勦滇黔不無雜派聲遠嚴飭胥役不
得擾累邑中大水屢肆多漂沒聲遠步行慰撫按
戶捐資助民營葺縣治南十里向有兩石神像居
民屠狗以祀供以銀花歲無虛日聲遠命左右碎

毀其像作礫狗石神文開示愚民載在邑志民思其德崇祀名宦祠

黃道行

黃道行漢軍鑲黃旗人康熙二十四年分守福建延建邵道延郡水陸交衝舊有里役大爲民累道行嚴行禁革郡中火親督員役撲滅之隨捐銀米按戶撫卹又時詣學宮進諸生講文藝反覆辨難優加禮異士風爲之一振士民感德祀之名宦祠